

An den guthertzigen Ehrliebenden Leser.



Demnach in diesem Buch dero Historischen Beschreibung von denen Inventionen / welche so wol in denen thurnieren zu roß vnd fuß/ als dem ringelrennen auff die Fürstliche Kindtauffe/ Frewlein Elisabethen/ vnd dann auch Herrn Morizen des andern/ etc. am Fürstlichen hoff zu Cassel celebriret vnd gehalten worden/ deren gangen denckwürdigen handlungen verzeichnus vnd Abriß auff gnedigen befehlich / des Durchleuchtigen/ Hochgebornen Fürsten vnd Herren/ Herren Morizen/ Landgrafen zu Hessen/ etc. ich menniglich vor augen zu stellen/mich vnterstanden: als hab ich auch vor nötig erkandt hierzu eine kurze erklerung zu setzen/ auff das beydes diejenige/ welchen diß Werck zu besehen vorkömmet / deren Personen kündig werden mögen/ vnd dann auch die/ so den habit vnd Kleidung mit farben besser anzudeuten gesinnet/ dessen eine ware nachrichtung haben können. Doch wil hiermit ich gelereten Leuten/welche dieser handlungen etwa eine bessere vnd krefftigere erklerung an tag zu geben staffieret/nicht vorgegriffen haben: Sondern es sol diese meine kurze beschreibung/ denen/so den Studijs vnd poetischen gedichten vnd erfindungen nicht obliegen können/ zum besten vnd nachrichtung von mir vorgenommen sein.

Ferner/ ob vielleicht der günstige Leser auch die Fürstliche vnd Gräfliche Personen/welche diesen ritterspielen mit einverleibet gewesen/ zu wissen begehrete/ so wölle er nachfolgenden bericht einnehmen. In dem Ringelrennen dero Fürstlichen Kindtauffe Frewlein Elisabethen/etc. seind gewesen der mehrer theil aus der Ritterschafft des Nider Fürstenthumbs Hessen: Vnd ist furnemlich in der vierden Invention auffgezogen Herr Moritz/ Landgraff zu Hessen/etc. In der sechsten hat gerennet Graf Simon von der Lippe: vnd in der siebenden Herzog Christoffer zu Braunschweig vnd Lüneburgk. Die Mantenadoren waren/ Otto von Starschedel/ S. H. Raht/ vnd Hans Ludwig von Münster/ S. Hessischer Stallmeister. In dem Roßthurnier aber haben manteniret erstlich Prensus Ritter vom kalten gestirn / ist gewesen nechstbemelter Stallmeister: Darnach Orbo der vnruhige Ritter/ ist gewesen Wallrab von Beunenburg: vnd leßlich der rise Themon/ ist gewesen Leo von Lewenstein. Kalomegathymus aber ist gewesen hochgedachter Herzog Christoph.

Anlan